

Šta je Popis?

Popis stanovništva je najveće statističko istraživanje jedne države kojim se prikupljaju, obrađuju i objavljuju podaci o stanovništvu, domaćinstvima i stanovima.

Kritični (referentni) momenat Popisa

Popis je presjek stanja u državi u jednom momentu koji je definisan kao kritični ili referentni momenat Popisa. Sve promjene nakon kritičnog momenta ne unose se u popisne obrasce. Podaci u popisnim obrascima trebaju se upisati prema stanju na dan 30. septembra 2013. godine u 24,00 sata, odnosno u ponoć između 30. septembra i 1. oktobra 2013. godine.

Prednost podataka prikupljenih Popisom

Najveći dio podataka koji se dobiva Popisom nije moguće prikupiti na drugi način. Prednost rezultata Popisa je što obuhvata stanovništvo na cijelom području države, sva domaćinstva i stanove u istom trenutku.

Jezik i pismo Popisa

Popisivanje se vrši na bosanskom, hrvatskom ili srpskom jeziku, latiničnim ili ćirilničnim pismom. Popisni obrasci i metodološka uputstva se štampaju na bosanskom, hrvatskom i srpskom jeziku, latiničnim i ćirilničnim pismom. Svaki popisivač će imati priručnik sa popisnicama na jezicima pripadnika nacionalnih manjina koje žive u BiH.



Obaveze građana i popisivača u Popisu

Obaveza građana je da budu popisani i da na sva pitanja daju tačne i potpune odgovore, a obaveza popisivača da unose odgovore onako kako ih daju ispitanici.

Organizacija Popisa

Popis stanovništva, domaćinstava i stanova u Bosni i Hercegovini, organizuju i provode tri statističke institucije: Agencija za statistiku BiH, Federalni zavod za statistiku i Republički zavod za statistiku Republike Srpske.

Osnovni obrasci koji će se koristiti u vrijeme Popisa

Popisnica (obrazac P-1) za prikupljanje podataka o osobi i Upitnik za domaćinstvo i stan (obrazac P-2) za prikupljanje podataka o domaćinstvima, stanovima i poljoprivrednim fondovima domaćinstva.

Jedinice koje se popisuju

Popisom su obuhvaćene osobe, domaćinstva i stanovi.

Individualni podaci su povjerljivi

Svi podaci su zaštićeni zakonom i koristiti će se isključivo u statističke svrhe.

Kontakt:

Za sva pitanja moći ćete se obratiti na broj Call Centre koji ćete naći na internet stranici www.popis2013.ba



THE PROJECT IS MANAGED
BY THE EUROPEAN UNION



EMBASSY OF SWEDEN
Project is funded by SIDA

Sadržaj ove publikacije je isključiva odgovornost Agencije za statistiku Bosne i Hercegovine / Federalnog zavoda za statistiku Federacije Bosne i Hercegovine / Republičkog zavoda za statistiku Republike Srpske i ni u kojem slučaju ne predstavlja stav Evropske unije niti SIDA-e.

POPIS • ПОПИС
BiH • 2013 • БиХ

1-15.10. 2013. godine

Moj korak u budućnost / Мој корак у будућност

BOSNA I HERCEGOVINA
AGENCIJA ZA STATISTIKU BiH

FEDERACIJA BOSNE I HERCEGOVINE
FEDERALNI ZAVOD ZA STATISTIKU

REPUBLIKA SRPSKA
REPUBLIČKI ZAVOD ZA STATISTIKU

Zakonski osnov pripreme i provođenja Popisa

Popis stanovništva se provodi na osnovu Zakona o popisu stanovništva, domaćinstava i stanova u Bosni i Hercegovini 2013. godine i Zakona o organizaciji i provođenju popisa stanovništva, domaćinstava i stanova 2013. godine u Republici Srpskoj.

Metoda popisivanja

Popis će se provoditi na tradicionalan način, metodom intervjua. Ovlašteni popisivači će posjetiti sva domaćinstva i obavljati intervjue sa građanima. Popisivanje će se vršiti svaki dan u vremenu od 09,00 do 21,00 sati i to u prisustvu najmanje jednog punoljetnog člana domaćinstva.

Cilj Popisa

Cilj svakog Popisa je ustanoviti broj stanovnika i njihove demografske, ekonomske, obrazovne i socijalne karakteristike, za cijelu državu i po svim teritorijalnim nivoima; broj domaćinstava, porodica i njihove karakteristike, te podatke o stambenom fondu i njegovim karakteristikama.

Koristi od Popisa

Podaci prikupljeni Popisom, neophodni su za provođenje ekonomskih i socijalnih razvojnih politika, naučnih istraživanja, za korištenje sredstava iz EU i drugih fondova, kao i druge potrebe građana. (Podaci neophodni za planiranje razvoja Bosne i Hercegovine, entiteta, Brčko distrikta BiH i općina).

Usaglašenost

Popis će biti proveden u skladu sa međunarodnim preporukama Ujedinjenih naroda i u skladu sa standardima Evropske unije, tako da će podaci biti međunarodno uporedivi i priznati.

Popisom se prikupljaju isti podaci u cijeloj BiH

Popis se provodi na teritoriji cijele Bosne i Hercegovine, u 142 općine (79 u Federaciji BiH i 62 u Republici Srpskoj) i Brčko distriktu BiH. Podaci se prikupljaju pomoću jedinstvenih upitnika i po jedinstvenoj i međunarodno uporedivoj metodologiji.

Korisnici podataka Popisa

Podaci koji se obezbjeđuju Popisom su potrebni državnim institucijama, privrednim organizacijama, akademskim zajednicama, civilnom društvu, naučnim institucijama za istraživanja i analize, međunarodnim organizacijama i institucijama i drugim korisnicima.

Objava rezultata

Agencija za statistiku BiH, u saradnji sa entitetskim zavodima za statistiku, utvrđuje popisne tabele i objavljuju rezultate Popisa. Preliminarni rezultati Popisa (o broju popisanih osoba, stanova i domaćinstava, kao i broj domaćinstava koja se bave poljoprivrednom proizvodnjom) biće objavljeni u roku od 90 dana nakon završetka popisivanja, a ostali rezultati određeni jedinstvenim programom za obradu podataka objavljivati će se u periodu od 1. 7. 2014. do 1. 7. 2016. godine.

Ko vrši popisivanje?

Popisivanje stanovništva, domaćinstava i stanova vršiti će ovlašteni popisivači koji će imati prepoznatljivu iskaznicu i torbu s popisnim materijalima. Popisivač je dužan, prije ulaska u kuću/stan, pokazati iskaznicu kojom potvrđuje ovlaštenje i ukratko objasniti cilj posjete.

Šta ukoliko Vas popisivač ne zatekne kod kuće?

Ako, u vrijeme popisivanja, popisivač ne zatekne u domaćinstvu (domu) osobe obuhvaćene Popisom, ostaviti će pismeno obavještenje o ponovnom dolasku. Ako ni pri drugoj posjeti ne pronađe nikoga, zakazuje treću posjetu. Ako ni tada ne pronađe nikoga ostavlja obavještenje sa kontakt podacima popisne komisije lokalne samouprave koju osobe trebaju kontaktirati najkasnije do 15. oktobra 2013. godine kako bi se organizovalo njihovo popisivanje. U iznimnim slučajevima, u vrijeme trajanja popisa, ako svi članovi domaćinstva koje nije do tog trenutka popisano, saznaju da moraju da otputuju i za njih niko neće moći dati podatke, mogu se obratiti popisnoj komisiji lokalne samouprave koja će im zakazati termin dolaska popisivača na adresu njihovog stanovanja.

Kontrola rada popisivača

Rad popisivača nadzirati će općinski/gradski, entitetski i državni instruktori i međunarodni posmatrači.

Postpopisna anketa

Neposredno nakon provedenog Popisa biti će provedena postpopisna anketa/kontrolni Popis na reprezentativnom uzorku popisnih krugova, radi ocjenjivanja obuhvata i kvaliteta podataka prikupljenih Popisom.



Podaci prikupljeni Popisom potrebni su za planiranje društveno-ekonomskog razvoja države za sve građane. Zbog toga učestvujte u Popisu!

Primite popisivače i odgovorite na njihova pitanja!

Samo tako će ovaj korak u budućnost biti uspješan.

